

Headlines

- प्रधानमंत्री नरेंद्र मोदी ते नाइजीरिया दे राष्ट्रपति बोला अहमद तिनुबू बश्कार गल्लबात च केई दक्खी विषयें पर चर्चा, दौनें मुख्यें आतंकवाद ते समुंद्री डकैती खलाफ किट्टे मिलिए लड़ने दा प्रण लैता।
- भारत नै अपनी लम्में छिंडे पर मार करने आहली सुपर सैनिक मिसाइल दी कामयाब अजमैश कीती, रक्षा मंत्री राजनाथ सिंह होरें इसी एतिहासिक दस्सेआ।
- चार रोजा राष्ट्रीय कृषि सम्मेलन 2024, 24 नवंबर कोला स्कास्ट जम्मू च लगगने जा'रदा ऐ।
- डेनमार्क दी विक्टोरिया कजैअर 73मीं मिस युनिवर्स बनी ऐ।

<><><><><><>

PM-Nigeria

प्रधानमंत्री नरेंद्र मोदी ते नाइजीरिया दे राष्ट्रपति बोला अहमद तिनुबू हुंदे बश्कार अज्ज गल्लबात अबुजा च “प्रिंसीडेंट विल्ला” च लग्गी। दौनें लीडरें भारत ते नाइजीरिया बश्कार सामरिक सांझ भ्याली दी समीक्षा कीती ते आपूं च दक्खिया सरबंधें गी होर निगगर बनाने दे बारै च चर्चा कीती। राष्ट्रपति तिनुबू हुंदे कन्नै शिष्टमंडल स्तरै दी गल्लबात दौरान मोदी होरें आखेआ जे भारत सामरिक भ्याली दे खेतरै च नाइजीरिया गी तरजीह दिंदा ऐ कीजे दवै मुख्य आतंकवाद ते पाइरेसी जनेइए चुनौतिएं दा मकाबला करदे आए न। मोदी होरें उनेंगी उत्थूं दे सब्बनें शा बड्डे सम्मान “ग्रैंड कमांडर ऑफ दा ऑर्डर ऑफ नाइजर” लेई बी उंदा आभार प्रगट कीता। मोदी होरें आखेआ जे भारत नाइजीरिया दे हाइ-राहत कम्में लेई 20 टन मनुक्खी राहत सहायता भेजा करदा ऐ। उनें मेद जाहिर कीती जे ब्रिक्स दा भ्याल बनने पर नाइजीरिया ग्लोबल साउथ सरबन्धी मुद्दे बाकी दी दुनिया दे सामने उजागर करोग।

<><><><><><>

DRDO

रक्षा अनुसंधान ते विकास संगठन-डीआरडीओ नै कल ओडिशा दे समुंदरी कंडू पर डॉ. एपीजे अब्दुल कलाम टापुयै थमां भारत दी पैहली लम्मी दूरी दी हाइपरसोनिक मिसाइल दा कामयाबी परीक्षण कीता। इस हाइपरसोनिक मिसाइल गी थेआरबंद बलें लेई डेढ ज्हार किलोमीटर थमां मती दूरी तगर बक्ख-बक्ख पेलोड लेई जाने आस्तै डिज़ाइन कीता गेदा ऐ। इस मिसाइल गी डाक्टर एपीजी अब्दुल कलाम मिसाइल परिसर हैदराबाद आसेआ डीआरडीओ दिएं होरनें लैबाटरिएं ते औद्योगिक भ्यालें कन्नै रलियै स्वदेशी तौर पर विकसित कीता गेआ ऐ। एहदी डुआरी आहली आजमाईश दे मौके पर उत्थे डीआरडीओ दे वरिष्ठ साईंसदान ते थेआरबंद बलें दे बड्डे अफसर बी मजूद हे। इक सोशल मीडिया पोस्ट च रक्षा मंत्री राजनाथ सिंह होरें इस आजमाईश गी इक ऐतिहासिक उपलब्धि करार दिता, जेह्दे'नै भारत महत्वपूर्ण ते उन्नत फौजी तकनीकें दी समर्थ आहले चोनमे देशें दे समूह च शामिल होई गेआ ऐ। उनें कामयाब आजमाईश लेई डीआरडीओ, थेआरबंद बलें ते रक्षा उद्योग गी ममारखबाद दिती।

<><><><><><>

Gourav-Pakhwada

भगवान बिरसा मुंडा हुंदी विरासत गी चेत्ता करने दे मकसद कन्नै देस भर दे शैक्षणिक इदारे आसेआ जनजातीय गौरव पखवाड़ा मनाया जा करदा ऐ। देस भरै च मनाए जाने आहला एह उतसव भारत दी सगोसार आदिवासी विरासत ते आदिवासी समुदायें दे योगदान दी इज्जत करदा ऐ। एह पखवाड़ा औने आहिलयें पीढ़ियें गी उंदे बलिदान गी स्वीकार करने ते उंदियें सांस्कृतिक प्रथाएं ते कलात्मक अभिव्यक्तियें दी सांभ-सम्भाल ताई प्रोत्साहित करने लेई प्रेरित करोग। केंद्र सरकार आदिवासी समुदायें दी भलाई-बेहतरी आस्तै लगातार कम्म करा'रदी ऐ। पिछले 10 बरें च अनुसूचित जनजातियें ताई विकास कम्मै दी स्कीमै आस्तै लगने आहले पैसे च 5 गुणा बाढ़ा होआ ऐ जेड़ा 2013-14 च 24 ज्हार 600 करोड़ शा बदिये 2024-25 च 1.23 लक्ख करोड़ रपे होई गेआ ऐ।

<><><><><><>

Paddar-Solar

किश्तवाड़ जिले च पाडर दी मचेल तहसील दे अधिकार क्षेत्र च पौंदी पंचैत मचेल, जेड़ी पवित्र चंडी माता मंदर लेई मशहूर ऐ, गी पी.एम सूर्यघर मुफ्त बिजली योजना तैहत सोलर आहली बिजली लेई नामजद कीता गेआ ऐ। प्रधानमंत्री हुंदे दफतरै च राज्यमंत्री डाक्टर जतिंद्र सिंह होरें सोशल मीडिया प्लेटफार्म एक्स पर इस खबर गी सांझा करदे होई आखेआ जे एहू मचेल दे बसनीकें ते माता दे भक्तें लेई खुशी आहली गल्लू ऐ। श्री सिंह होरें गलाया जे किश्तवाड़ दे डी.सी राजेश कुमार शवन होर इस मामले ग सक्रिय तौरा पर अगगे बदा'रदे न। ध्यानजोग ऐ जे जम्मू-कश्मीर च अमरनाा जी दी यात्रा दे बाद हर बरे लक्खें बहे तीर्थ यात्री मचेल च देवी चंडी दे पवित्र मंदर दी यात्रा करदे न ते इस गैं कन्नै इलाके च धार्मिक सैलसफे गी बढ़ावा थ्होग।

<><><><><><>

Rally-Surankote

सेना नै पुंछ जिले दे सुरनकोट च एडवान्सड लैंडिंग ग्राउंड ए.एल.जी च 10 दिनें दी बड्डे पैमाने पर भर्त्थी रैली दा सरिस्ता कीता। इस रैली च 26 ज्हार शा बद्द नौजोआनें हिस्सा लैता। पुंछ थमां आकाशवाणी संवाददाता अनुभव मिसरी होरें दस्सेआ जे इस अभियान च बड़ी मती हिस्सेदारी दिक्खी गेई जेदे च 4000 शा बद्द मेदवारें ग्राउंड टैस्ट पास कीता ते हुन उंदी मेडिकल जांच कीती जाग।

<><><><><><>

LG-Visit

उपराज्यपाल मनोज सिन्हा होरें अज्ज रियासी जिले च त्रिकुटा पहाड़ियें पर स्थित श्री माता वैष्णो देवी दे मंदर च पूजा कीती ते केंद्र शासित प्रदेश च अमन-रमानदारी ते खुशहाली लेई प्रार्थना कीती। सूचना ते जनसंपर्क मैहकमा जम्मू-कश्मीर नै एक्स पर इस सरबंध्यै च जानकारी सांझी करदे होई लिखेआ जे एल.जी होरें माता वैष्णो देवी दे मंदर च पूजा-अर्चना कीती।

<><><><><><>

J&K-SKUAST-Jammu

शेर-ए-कश्मीर कृषि विज्ञान ते टेक्नालोजी यूनिवर्सिटी जम्मू चऊं दिनें आहले राश्ट्री कृषि शिखर सम्मेलन दी मेजबानी करन जा'रदी ऐ। आकाशवाणी दे जम्मू संवाददाता नै दस्सेआ जे एहू सम्मेलन 20 नवंबर शा लेइयै 23 नवंबर 2024 तगर जम्मू शहरा दे बाहरले इलाके चट्टा आहले मुख परिसर च राई-बाई उत्पादन ते करसान कल्याण, बागवानी पशुपालन ते होर दुए मैहकमें दे सहयोग कन्नै आयोजित कीता जा'रदा ऐ। इस शिखर सम्मेलन दा सिरलेख ऐ कृषि ते एहदे कन्नै जुडी दियें साइंसें च नमियें काइउं दा दोहन। जम्मू-कश्मीर दे कन्नोकन्नी गोआंडी राज्यें पंजाब, हिमाचल प्रदेश, उत्तराखंड, हरियाणा ते केंद्र शासित प्रदेश लद्दाख थमां तकरीबन 12 शा 15 ज्हार लोकें दी मौजूदगी कन्नै एहू शिखर सम्मेलन इक्क ऐतिहासिक आयोजन बनने लेई तैयार ऐ।

<><><><><><>

Income-Tax

इंकम टैक्स मैहकमे नै करदाताएं गी सौहगा कीता ऐ जे ओहू अपनी विदेशी संपत्तिएं दा सेही-सेही ब्यौरा दाखल करन। मैहकमे नै अज्ज करदाताएं गी आगाह कीता ऐ जेकर उने विदेश च मौजूद अपनी संपत्ति जां विदेश च कमाई गेदी औंदन दा जिक्र अपने इंकम टैक्स रिटर्न च नेई कीता तां एहदे लेई उंदे पर 10 लक्ख रपे तोहड़ी दा जुर्माना लग्गी सकदा ऐ। इंकम टैक्स मैहकमे नै करदाताएं गी आखेआ ऐ जे ओहू 2024-25 बरे च आयकर रिटर्न च एहू जानकारी जरूर देन। मैहकमे दा आखना ऐ जे भारत दे करदाताएं लेई विदेशी बैंक खाते, नकद मूल्ल बीमा, अनुबंध जानी ठेके पर जां सलाना कान्ट्रैक्ट पर, कुसै युनिट जां व्यवसाय च माली सांझ-भ्याली, अचल संपत्ति, कस्टोडियन खाता, इक्विटी ते दोआर कर्जे बगैरा जनेइएं कुसै बी चाल्ली दिएं संपत्तिएं दे बारे च जानकारी जरूर देन।

<><><><><><>

Criminal-Justice

जम्मू-कश्मीर न्यायिक अकादमी आसेआ नमें आपराधिक कनूनें दे सरबंघै च आपराधिक न्याय प्रशासन ते जजें लेई सिविल ते आपराधिक नियमें दे बारे च लोआए गेदा 2 रोजा सम्मेलन अज्ज सम्पन्न होई गेआ। जारी इक प्रेस विज्ञप्ति मूजब 2 दिनें दी इस कांफ्रेंस च वक्ताएं आपराधिक न्याय प्रशासन दे बक्ख-बक्ख नियमें ते सिद्धांतें दे बारे च तफसीली चर्चा कीती ते इस गल्लै पर जोर भरेआ जे आपराधिक मामला कैसा बी कीहू मुल्जिम गी उच्च आपराधी नेई मन्नेआ जाना लोड़चदा जिच्चर ओहदा अपराध साबत नेई होई जंदा। कांफ्रेंस च सब्बनें नियमें सिद्धांतें गी असल जिंदगी ते बवहार च बी हू-बहू अमल च आंदे जाने पर जोर भरेआ गेआ।

<><><><><><>

Medical-Camp

रामबन च सी.आर.पी.एफ दी बटालियन 84 नै अपने सिविक एक्शन कार्जक्रम तैहत डिगडोल ग्रां च अज्ज इक्क दिने आहले मुफ्त मेडिकल कैप दा सरिस्ता कीता। खीरी जानकारी थोने तगर तकरीबन 200 लोकें दी इस कैप च जांच कीती जाई चुकी दी ही ते उनेंगी मुफ्त दोआइयां बी दित्तियां गेइयां। कैप दा उद्घाटन कमांडेंट एन. रणबीर सिंह होरें सी.आर.पी.एफ दे होर दुए आला अफसरें ते मुख्ब ग्रां दे मुख्ब बसनीकें दी मौजूदगी च कीता।

<><><><><><>

Udhampur-Sports

अभ्युदय यूथ क्लब आसेआ एकल अभियान तैहत आयोजित दऊं दोजा एकल खेडू टूर्नामेंट अज्ज सुभाश स्टेडियम उधमपुर च रम्भ होआ। एहदे च 472 विद्यार्थी हिस्सा लै करदे न, जेडे लम्मी ते छोड़ी द्रौड़, कबड्डी, कुश्ती बगैरा खेडूएं च हिस्सा लैडन। शुरूआती ध्याड़े शुभाश स्टेडियम च बड़ी मती भीड़ दिक्खी गई।

<><><><><><>

Mendhar-Marathon

इक्क अधिकार नै दस्सेआ ऐ जे जम्मू-कश्मीर च पुंछ जिले दे मेंढर सेक्टर च सेना दी भिम्बर गली ब्रिगेड आसेआ अज्ज आयोजित कीती गेदी मिनी मैराथन च सैकड़ें बद्दे लोकें हिस्सा लैता। आप्रेशन सद्भावना तैहत आयोजित कीती गेदी इस द्रौड़ दा मकसद फौज ते लोकें बश्कार आपसी सरबंधें गी मजबूत बनाना हा।

<><><><><><>

Miss-Universe 2024

डेनमार्क दी विक्टोरिया केजर थेलविग गी इस बरे ताई मिस यूनिवर्स चुनेआ गेआ ऐ जेड़ी खूबसूरती कन्नै जुड़ी दी इक अंतरराष्ट्री मुकाबले च उंदे देसै दी पैहली जित्त ऐ। खूबसूरती दे मुकाबले दा 73मां संस्करण कल रातीं मैक्सिको सिटी एरीना च आयोजित कीता गेआ। एहदे च 120 शा बद्द प्रतियोगियें हिस्सा लैता हा। मिस नाइजीरिया चिदिम्मा एडेटशिना दुई थाह्वै पर जिल्ले के मिस मैक्सिको मारिया फर्नांडा बेल्ट्रान त्री थाह्वै पर रेई।

<><><><><><>